

PLUS PERUNTUK RM37 JUTA UNTUK KERJA PENAMBAHBAIKAN KEMUDAHAN TANDAS AWAM DI 56 LOKASI SEJAK 2023

Petaling Jaya, 17 September 2025:- Dalam usaha menyediakan pengalaman perjalanan yang lebih baik kepada pengguna lebuhraya, PLUS Malaysia Berhad (PLUS) telah memperuntukkan kira-kira RM37 juta untuk kerja-kerja penambahbaikan tandas awam secara berperingkat yang telah dijalankan sejak 2023 hingga kini.

PLUS telah dan sedang melaksanakan kerja-kerja penambahbaikan kemudahan tandas awam di 56 lokasi di Kawasan Rehat dan Rawat (R&R), Hentian Sebelah, Restoran Jejantas dan Plaza Tol sepanjang lebuhraya kendaliannya. Sebanyak 32 dan 16 lokasi penambahbaikan kemudahan tandas telah dijalankan pada 2023 dan 2024. Pada tahun ini, kerja-kerja penambahbaikan kemudahan tandas dijangka akan dijalankan di 8 lagi lokasi.

Menurut Pengarah Urusan PLUS, Datuk Nik Airina Nik Jaffar, “Di bawah Pelan Induk 5 tahun Pembangunan dan Penambahbaikan Fasiliti bagi R&R dan hentian sebelah, beberapa lokasi R&R dan hentian sebelah di Lebuhraya kendalian PLUS telah dikenalpasti untuk dinaik taraf, dalam usaha menyediakan kemudahan yang lebih selesa dan meningkatkan tahap perkhidmatan yang lebih efisien kepada pengguna lebuhraya. Dalam Pelan ini, sebanyak 5 R&R dan 11 Hentian Sebelah sedang dan akan dinaiktaraf secara berperingkat sehingga 2028.

“Dalam masa sama, PLUS akan menaik taraf beberapa lokasi R&R dan hentian sebelah terpilih secara berperingkat dengan menyediakan kemudahan yang lebih selesa pada masa akan datang antaranya di Hentian Sebelah Pedas Linggi (Arah Utara), Hentian Sebelah Bukit Gantang (Arah Selatan), Hentian Sebelah Tangkak (Arah Utara) dan R&R Machap (Arah Selatan),” tambah beliau.

Kerja penambahbaikan tandas sedang giat dijalankan

Beberapa kerja penambahbaikan tandas sedang giat dijalankan sejak 2024 di lokasi-lokasi sepanjang lebuhraya antaranya di R&R Gurun (Arah Utara), R&R Gunung Semanggol (Kedua-dua Arah), R&R Dengkil (Arah Selatan), Restoran Jejantas Ayer Keroh (Kedua-dua Arah), Hentian Sebelah Simpang Pulai (Arah Selatan), R&R Sungai Perak (Kedua-dua Arah), R&R Seremban (Arah Utara) dan R&R Ayer Keroh (Arah Utara), Hentian Sebelah Sungai Bakap (Kedua-dua Arah), Hentian Sebelah Rawang (Arah Selatan), Hentian Sebelah Gua Tempurung (Arah Selatan) dan Hentian Sebelah Kulai (Arah Utara). Sebahagian besar daripada tandas di lokasi-lokasi tersebut telah siap ditambah baik dan sedia untuk digunakan. Bagi lokasi-lokasi yang sedang dalam proses ditambah baik, kerja-kerja ini dijangka siap selewat-lewatnya pada penghujung tahun 2025.

“Konsep reka bentuk kemudahan tandas yang ditambah baik di PLUS mengadaptasi konsep kontemporari dengan menekankan aspek-aspek kelestarian, serta landskap untuk pengudaraan dan pencahayaan semula jadi. Ia juga dilengkapi dengan peralatan sanitari antaranya pili sinki dan pam tandas cekap air. Ini selari dengan usaha PLUS dalam melestarikan operasi lebih mesra alam di sepanjang jajaran lebuh raya kami,” ujar beliau.

Kemudahan tandas di beberapa lokasi terpilih juga telah ditambah baik dengan menambah bilangan tandas duduk. Ia turut dilengkapi dengan kubikel khas untuk Orang Kelainan Upaya (OKU), kubikel untuk keluarga dan kanak-kanak, bilik menukar lampin bayi serta kemudahan tempat mandi.

Kerja penambahbaikan tandas pada 2025

Kerja-kerja penambahbaikan tandas pada tahun 2025 sedang giat dijalankan di lokasi-lokasi berikut antaranya di R&R Mambau (Kedua-dua Arah), R&R Pagoh (Arah Utara), Hentian Sebelah Yong Peng (Arah Utara), Hentian Sebelah Kulai (Arah Selatan), Plaza Tol Kulai, Plaza Tol Sedenak dan Plaza Tol Simpang Renggam. Semua kerja-kerja ini dijangka siap pada 2026.

“Usaha ini merupakan inisiatif berterusan PLUS dalam menyediakan kemudahan yang lebih baik serta meningkatkan keselesaan kepada pengguna lebuh raya yang singgah untuk berhenti rehat dan menggunakan fasiliti sepanjang Lebuhraya PLUS. Kami juga amat menghargai kerjasama daripada orang ramai untuk sama-sama menjaga dan dapat menggunakan semua kemudahan yang disediakan ini dengan baik demi kesejahteraan dan keselesaan semua pihak,” tambah beliau.

-TAMAT-

PERTANYAAN MEDIA:

Mashitah Mohd Arshad Pemangku Ketua Komunikasi Korporat PLUS Malaysia Berhad Telefon Bimbit: 013-2097092 Emel: mashitah@plus.com.my	Rofina Adam Pengurus Komunikasi Korporat PLUS Malaysia Berhad Telefon Bimbit: 012-657 4452 Emel: rofina@plus.com.my
---	---